



PRAVILNIK

O KUĆNOM REDU I NAČINU KORIŠTENJA OBJEKTA «OLIMPIJSKOG BAZENA OTOKA»

Sarajevo, februar 2024. godine

Na osnovu člana 11. Zakona o javnim preduzećima u Federaciji Bosne i Hercegovine („Službene novine F BiH“, broj: 08/05, 81/08, 22/09, i 109/12), člana 339. Zakona o privrednim društvima („Službene novine F BiH“, broj: 81/15 i 75/21), člana 34. i 35. Statuta Javnog preduzeća „Olimpijski bazen Otoka“ d.o.o. Sarajevo broj: 01-1-383-5/23 od 20.02.2023. godine, direktor Preduzeća, donosi:

P R A V I L N I K

O KUĆNOM REDU I NAČINU KORIŠTENJA OBJEKTA «OLIMPIJSKOG BAZENA OTOKA»

POGLAVLJE I - OPŠTE UVODNE ODREDBE

Član 1. (Opšte odredbe)

- (1) Objekat «OLIMPIJSKI BAZEN OTOKA» je objekat od šireg društvenog značaja, Gradu Sarajevu, Kantonu Sarajevo, Federaciji Bosne i Hercegovine i Bosni i Hercegovini u cjelini.
- (2) Opredijeljenost Grada Sarajeva za izgradnju objekta koji zadovoljava sve potrebe savremenog bavljenja sportom i tjelesnim odgojem, zahtjeva od svih korisnika usluga domaćinski odnos i čuvanje prilikom njegovog korištenja, što će dovesti do maksimalnog produženja vijeka trajanja.
- (3) Objekat Olimpijskog bazena Otoka obezbeđuje potrebne higijenske i tehničke uslove i omogućuje da se i pored masovnog korištenja i istovremenog boravka velikog broja korisnika usluga (sportista i rekreativaca), pruže optimalni uslovi korištenja i očuvanja zdravlja korisnika. Zbog toga su i projektovani i izgrađeni posebni dijelovi u kojima se boravi u odjeći i obući i dijelovi koji se koriste isključivo u sportskoj opremi – tzv. „čisti“ i „prljavi“ hodnici. Istovremeni boravak velikog broja ekipa i sportista različitog uzrasta, zahtjeva maksimalnu organizovanost na očuvanju reda i discipline, higijene i cjelokupne opreme.

Član 2. (Predmet Pravilnika)

Pravilnikom o kućnom redu i načinu korištenja objekta «OLIMPIJSKI BAZEN OTOKA» (dalje: Pravilnik) uređuje se način rada objekta «OLIMPIJSKI BAZEN OTOKA» (dalje: objekat), utvrđuju se pravila koja regulišu: ponašanje posjetilaca - korisnika usluga od dolaska ispred objekta Olimpijskog bazena Otoka, korištenje parkinga, ulazak u objekat, boravak i korištenje velikog i malog bazena, prostorija za fitnes, teretenu, saunu i masažu, te održavanje reda, čistoće i sigurnosti u vrijeme njegovog rada.

Član 3. (Gramatička terminologija)

Gramatička terminologija korištenja muškog i ženskog roda za pojmove u ovom pravilniku uključuje oba roda.

Član 4. (Odgovornost)

- (1) Za pravilno korištenje i čuvanje objekta i primjenu Pravilnika o kućnom redu i načinu korištenja, odgovorni su radnici objekta „Olimpijskog bazena Otoka“, te sportski radnici, treneri, sportisti, odgovorni radnici udruženja i njihovi članovi i posjetioci - rekreativci.
- (2) Svaki posjetilac - korisnik usluga pri ulasku u objekat je u obavezi da se upozna sa ovim Pravilnikom, kao i da poštuje njegove odredbe.

- (3) Kupovinom ulaznice ili rezervacijom termina posjetioci - korisnici usluga prihvataju Pravilnik i njegove odredbe i potvrđuju da su ovaj Pravilnik pročitali. Isto tako se obavezuje da će se pridržavati odredbi, smjernica, upozorenja, zabrana i naređenja, koja su navedena u Pravilniku, kao i na info i ostalim tablama, koje se nalaze u objektu. Kupovinom ulaznice posjetilac potvrđuje da je svjestan posljedica koje proizilaze iz kršenja odredbi Pravilnika.
- (4) Posjetioci – korisnici usluga (sportisti i rekrativci) obavezni su izbjegavati sve radnje, koje narušavaju udobnost drugih posjetilaca - korisnika usluga (sportista i rekrativaca), ili koje narušavaju radne obaveze radnika u objektu.
- (5) Odgovornost Uprave za povrede, oštećenje imovine ili finansijski gubitak je limitirana u okviru zakonske regulative.
- (6) Sva aktuelna uputstva u objektu imaju prednost nad opštim propisima i uputstvima.

Član 5. (Pravila ponašanja ispred objekta)

Prilikom dolaska ispred objekta Olimpijskog bazena Otoka korisnici svoja motorna vozila, motocikle i bicikle ostavljaju na posebno označenim mjestima parkinga ispred objekta. Mesta na parking prostorima rezervisana za invalidna lica mogu samo koristiti pripadnici te kategorije građana.

POGLAVLJE II - NAČIN KORIŠTENJA BAZENA I PONAŠANJE SPORTISTA – EKIPA

Član 6. (Ulaz sportista u objekat)

Sportisti kao korisnici usluga u prostore objekta Olimpijskog bazena Otoka na treninge i takmičenja mogu uči samo kao organizovana grupa pod rukovodstvom stručnog lica kluba (trenera).

Član 7. (Trening, obaveze i dužnosti stručnog lica kluba-trenera i sportista koji prisustvuju treningu)

Sportisti i njihovi treneri obavezni su se pridržavati sljedećeg protokola korištenja prostora Olimpijskog bazena Otoka:

- Dolazak u objekat najmanje 20 minuta prije početka termina treninga;
- Mjesto okupljanja sportista prije treninga je ispred zgrade ili u holu objekta;
- Sportisti u prostore objekta Olimpijskog bazena Otoka za treninge mogu uči i iz istih izaći na sportskoj recepciji samo kao organizovana grupa pod rukovodstvom stručnog lica kluba (trenera). U slučaju kašnjenja nekog od članova kluba ili kolektiva, stručno lice kluba (trener) kao odgovorno lice je obavezno sačekati svog člana i uvesti ga ili izvesti iz prostora Olimpijskog bazena Otoka;
- Prilikom ulaska u objekat sportisti su obavezni da imaju odgovarajuću sportsku opremu;
- Stručna lice kluba (treneri) moraju se javiti odgovornom licu na sportskoj recepciji i upoznati se sa dnevnim rasporedom kako bi tačno utvrdili koji su kapaciteti i na koji način istom dodijeljeni;
- Stručna lice kluba (treneri) obavezna su pridržavati se uputa odgovornog lica na sportskoj recepciji;
- Stručno lice kluba (trener) preuzima od odgovornog lica ključ od svlačionice na sportskoj recepciji;
- Prije ulaska stručno lice kluba (trener) vrši pregled stanja ispravnosti preuzetih svlačionica;

- Sportisti iz svlačionice izlaze u čist hodnik bazena i mogu se kretati isključivo bosi ili u čistim papučama;
- Poslije treninga stručno lice kluba (trener) predaje svlačionice u istom stanju kakve ih je zatekao i u slučaju učinjene štete napraviti će se zapisnik sa ovlaštenim radnikom Objekta;
- Djeca sportisti su isključivo briga stručnih lice kluba (trenera) od momenta ulaska u objekat i sve do završetka treninga kad roditelji preuzmu djecu u holu u prizemlju objekta;
- Treneri klubova, koji rade sa djecom manjeg uzrasta, imaju pravo da u suteren objekta Olimpijskog bazena Otoka, povedu do tri roditelja za ispomoć u presvlačenju djece. Roditelji ne mogu samoinicijativno prolaziti, to mogu isključivo sa trenerom.
- Po završetku treninga, trener ce doci do prizemlja objekta, odakle ce opet povesti do tri roditelja za pomoć u oblačenju i sušenju kose. I u tom slučaju, neće biti dozvoljen samovoljan prolazak roditeljima bez pratnje trenera.
- stručno lice kluba (trener) dužno je po završetku korištenja svlačionice i poslije predaje svlačionice u ispravnom stanju istu zaključati i ključ vratiti odgovornom licu sportske recepcije;
- Svu štetu na opremi i imovini objekta koju učine članovi kluba nepravilnim rukovanjem i ponašanjem snosi klub;
- Klub ne može ostavljati svoju opremu u svlačionicama poslije treninga i Uprava objekta ne snosi odgovornost za opremu koja ostane;
- Olimpijski bazen Otoka nema obavezu čuvanja izgubljenih stvari;
- Ekipa se može zadržati u svlačionici najduže 15 minuta po završetku treninga;
- Da se kretanja lica koja prisustvuju treningu odvija dogovorenim hodnim linijama, na način da njihovo kretanje ne ometa odvijanje drugih sadržaja u objektu niti da se ugrozi sigurnosti lica koja prisustvuju treningu, drugih korisnika objekta i samog objekta;
- da se lica koja prisustvuju treningu ponašaju u skladu sa ovim „Kućnim redom i pravilima ponašanja“ objekta, te da se pridržavaju pravila o protivpožarnoj zaštiti i zaštiti na radu.

Član 8. (Obaveze stručnih lica klubova)

(1) Obaveze stručnih lica klubova (trenera) korisnika usluga su:

- da kod ovlaštene firme za osiguranje imovine i lica vrijednosno osigura članove kluba i opremu za trening, odnosno lica koja prisustvuju treninzima;
- da obezbijede odgovarajuće lječarsko uvjerenje za sve učesnike treninga;
- da postave plivačku opremu i plivačke rezervne u funkciji treninga te da ih uklone nakon završenog termina za trening kako bi bazen bio spremna za druge korisnike usluga;
- da svu opremu i rezervne koji su vlasništvo Olimpijskog bazena Otoka koristi na način dobrog domaćina;
- da nadoknadi eventualnu štetu koja nastane na stvarima, opremi, instalacijama i objektu, a koju su prouzrokovali članovi Korisnika usluga;
- da predmetni zakupljeni prostor koristi isključivo za ugovorenu namjenu treniranja, bez korištenja za druge namjene ili davanje u podzakup;
- da ovlaštenom licu Olimpijskog bazena Otoka dostavi spisak sa imenima i osnovnim podacima za lica koja će voditi treninge i posebno za lice koje će biti ovlašteno lica Korisnika usluga;
- da svoje zahtjeve i obavještenja o svim promjenama obavezno dostavlja u pisanoj formi;

- Djeca uzrasta do 3 godine, obavezni su imati pelene za kupanje, a djeca uzrasta od 4 godine i više, shodno polu, odgovarajući kupaći kostim ili slip gaćice.
- Sva lica koja koriste kapacitete bazena (treneri, članovi kluba, rekreativci), a ne poštuju ovaj pravilnik biti će javno opomenuta;
- Iz prostora objekta od strane redarske službe može biti udaljen, bez povrata novca za ulaznicu, posjetilac koji se i nakon usmenog upozorenja ne pridržava odredbi ovog Pravilnika ili ne posluša uputstva radnika objekta.

- (2) Korisnik usluga se obavezuje da će se pridržavati prethodno dogovorenog mjesecnog rasporeda sa vrstom, količinom i terminima korištenja kapaciteta bazena.
- (3) Zaštitar na recepcionarskim poslovima predaje stručnom licu kluba (treneru) svlačionicu i ključ od iste. Stručno lice kluba (trener) je obavezan prilikom preuzimanja svlačionice da konstatuje njenu ispravnost, te ispravnost opreme u svlačionici.
- (4) Uprava objekta ne snosi odgovornost za eventualne nestale stvari kluba prilikom korištenja svlačionica i sadržaja Objekta.
- (5) Prije treninga stručno lice kluba (trener) je obavezan da provjeri ispravnost sprava i rekvizita koje im se ustupaju na upotrebu i koji će se koristiti samo za vrijeme trenažnog procesa.
- (6) Stručno lice kluba (trener) je odgovoran za pravilnu upotrebu sprava i rekvizita. Sve neispravnosti stručno lice kluba (trener) prijavljuje prije treninga zaštitaru na recepcionerskim poslovima.
- (7) Neispravnost sprava i rekvizita radnici Objekta će pokušati otkloniti ili zamjeniti prije početka treninga.
- (8) Po završetku treninga, trener i zaštitar na recepcionerskim poslovima konstatuju ispravnost opreme i rekvizita koji su korišteni.

Član 9. (Utakmica)

- (1) Program utakmica ili takmičenja sa satnicom održavanja dostavlja se saradniku za planiranje rasporeda trenažnog procesa mjesечно, a najkasnije 25- tog tekućeg mjeseca za naredni mjesec.
- (2) Izmjene termina i naknadne utakmice ili takmičenja mogu se u opravdanim slučajevima prijaviti najmanje 5 dana prije održavanja utakmica odnosno takmičenja.
- (3) Na osnovu mjesecnog plana održavanja utakmica, prijavu MUP-u Kantona Sarajevo, službi Hitne pomoći i Profesionalnoj vatrogasnoj brigadi za održavanje javnih skupova vrše klubovi-organizatori.
- (4) Izmjene i dopune plana takođe prijavljuje klub, organizator utakmice ili takmičenja.

Član 10. (Obaveze organizatora utakmice ili takmičenja)

- (1) Način dolaska na utakmice, ulaska u objekat, svlačionice i bazen je po istom postupku kao i za treninge.
- (2) Predstavnik kluba, domaćin takmičenja dočekuje i odgovara za ponašanje gostujućih ekipa odnosno takmičara.

- (3) Predstavnik kluba preuzima ključeve svlačionica, službenih prostorija, sale sa opremom, bazena, identifikacioni dokument i oznake za službena lica na takmičenju najkasnije jedan sat prije početka takmičenja.
- (4) Po završetku utakmice ili takmičenja, nakon konstatacije ispravnosti preuzetih prostora i opreme, predstavnik kluba vraća ključeve i identifikacione dokumente i oznake.
- (5) Svu štetu koju učini gostujuća ekipa ili takmičari, snosi klub organizator utakmice.

POGLAVLJE III - NAČIN KORIŠTENJA BAZENA I PONAŠANJE POSJETIOCA - KUPAČA.

Član 11. (Ulag u objekat)

- (1) Ulag je dozvoljen samo u radno vrijeme sa važećom ulaznicom ili sezonskom kartom, koje posjetilac kupuje na blagajni.
- (2) Djeci mlađoj od 13 godina ulaz je dozvoljen samo u pratnji osobe starije od 18 godina.
- (3) Objekat može biti tokom određenih sati rezervisan za škole, društvene, sportske i druge organizacije. Za to vrijeme je u određenom prostoru kupanje ostalim posjetiocima zabranjeno. Kada su kapaciteti objekta popunjeni, uprava zadržava pravo da zabrani ulaz ostalim posjetiocima.
- (4) Svaki korisnik na plivalištu mora koristiti papuče za trening ili higijenske navlake na obući koje će zadužiti na jednoj od recepcija bazena;
- (5) Svaki korisnik, koji je kupio kartu, obavezan je da ima sportsku opremu a to su: kapa za kupanje, jednodijelni ili dvodijelni kupaći slip kostim, peškir i papuče.
- (6) Poslije kupovine karte, korisnik je obavezan, da nakon silaska u ženske (A) ili muške (B) hodnike, skine obuću, istu ostavi ispred prostora namijenjenim za dio obuće, ili u ormarić sa brojem.
- (7) Nakon izvanja, korisnik je obavezan da obuje čiste papuče ili ds bos uđe u prostor koji je namijenjen za prevlačenje (kabinu/e).
- (8) Nakon presvlačenja, korisnik je obavezan svoju ličnu garderobu, odložiti u prostor namijenjen za to (ormarić), te u papučama ili bos krenuti ka tuševima.
- (9) Korisnik koji izlazi nakon toga na plivalište, obavezan je da se istušira, te proći kroz vodo-barijeru (u kojoj se nalazi dezinfekciono sredstvo) u određenoj koncentraciji koja ne utiče negativno na zdravlje korsnika bazena.
- (10) Posljednja prodaja ulaznica i ulaz u objekat je moguća najkasnije sat i pol prije zatvaranja objekta.
- (11) Svaki popust se može ostvariti uz pokazivanje identifikacione isprave sa fotografijom. Odrasli – lična karta ili pasoš, djeca – zdravstvena knjižica ili pasoš (može i fotokopija).

Član 12. (Zabranu ulaska u objekat)

- (1) Zabranu ulaska u objekat mogu imati:
 - a) osobe oboljele od zaraznih bolesti (u slučaju nedoumice od posjetioca može biti tražena potvrda od ljekara), osobe sa otvorenim ranama, eventualno kožnim problemima (npr. ljuštenje kože, osipi, kožni paraziti), ili osobama koje boluju od bilo kakvih bolesti koje mogu da ugroze zdravlje ostalih posjetilaca, na primjer: osobe sa temperaturom, kašljem, upalom oka (konjuktivitis), osobe sa zaraznim bolestima ili bolestima koje izazivaju gađenje, klicanoše crijevnih i drugih bolesti, osobe sa zavojima na tijelu, a također i osobe vidno fizički prljave,

u prljavoj odjeći i vašljive. Također članovi porodice osoba oboljelih od zaraznih bolesti, koji su od porodice izolovani, eventualno osobe sa oboljenjima praćenim iscjetkom,

- b) osobe, koje planiraju da koriste objekat u komercijalne svrhe ili nestandardno korištenje bez odobrenja kompetentne osobe Objekta,
- c) osobe, čija posjeta bi mogla da poremeti red, sigurnost i čistoću kompleksa, a njihovo ponašanje je u suprotnosti sa moralnim i opće prihvaćenim društvenim načelima,
- d) osobe koje nemaju adekvatnu plivačku opremu (plivačka kapa, kupaće gaćice i kupaći kostim).

(2) Zabrana ulaza važi za osobe pod uticajem alkohola, droga ili drugih narkotičkih sredstava.

(3) U objekat je zabranjeno uvoditi životinje.

(4) Iz sigurnosnih razloga osobama, koje se ne mogu samostalno kretati, oblačiti ili svlačiti bez pomoći druge osobe, također osobama sa fizičkim ili mentalnim smetnjama, ulaz u objekat je dozvoljen samo uz pratnju ovlaštenog skrbnika.

(5) Iz prostora objekta redarska služba ili ovlašteni uposlenici JP "Olimpijski bazen Otoka" d.o.o. Sarajevo mogu udaljiti posjetioca, bez povrata novca za ulaznicu, koji se i nakon usmenog upozorenja ne pridržava odredbi ovog Pravilnika ili ne posluša uputstva radnika objekta.

U krajnjem slučaju, prema karakteru zabranjenog ponašanja, zaštitar-spasilac, zaštitar-recepcioner, redar, spasilac iz vode, čuvar recepcioner, čuvar nadzor na objektu ili direktor Preduzeća u obavezi je da zatraži intervenciju direktno nadležnih organa sigurnosti – MUP-a.

(6) Uprava ima pravo da zabrani ulaz u objekat nepoželjnim licima.

POGLAVLJE IV - Informacije o radu i pravilima ponašanja u objektu za posjetioce

Član 13. (Ograničenja posjetilaca pri korištenju usluga)

- (1) Vrijeme boravka u objektu je ograničeno vremenom na koje je kupljena važeća ulaznica. Ako se navedeno vrijeme za kupanja prekorači, posjetilac je u obavezi da plati doplatu u skladu sa važećim cjenovnikom.
- (2) Posjetioci kompleksa obavezni su koristiti odgovarajuću kapu za plivanje i vlastiti kupaći kostim koji mora da bude čist i papuče za plažu.
- (3) Nudizam je zabranjen.
- (4) Posjetici koji koriste usluge teretane i fitnessa obavezni su imati čistu sportsku odjeću i obuću za tu namjenu, te prilikom svih oblika i načina vježbanja u teretani i fitnessu koristiti lični peškir.
- (5) Posjetioci se mogu svlačiti i oblačiti samo na mjestima predviđenim za to - u garderobama ili svlačionicama.
- (6) Iz sigurnosnih razloga zabranjeno je nositi bilo kakvu staklenu ambalažu.

- (7) Zabranjeno je uzajamno gnjuranje, bacanje-guranje drugih u vodu, skakanje u vodu.
- (8) Uprava preporučuje da se u objekat ne unose vrijedne stvari i veća količina novca.
- (9) Uprava ne odgovara za krađu i nestanak stvari u okviru objekata.
- (10) Za upotrebu sportskih rekvizita i rekvizita za igru neophodna je dozvola dežurnog osoblja.
- (11) Propustna moć svih kapaciteta objekta je ograničena zbog sigurnosti posjetilaca.
- (12) Uprava objekta ne garantuje korištenje svih kapaciteta neograničen broj puta i bez čekanja na korištenje istih.
- (13) U objektu je postavljen ograničen broj ležaljki i suncobrana koje posjetioci mogu da koriste besplatno za vrijeme boravka u istom. Nakon popune kapaciteta ležaljki i suncobrana Uprava nije obavezna da preostalim posjetiocima obezbjedi korištenje istih

Član 14.
(Obaveze posjetioca)

- (1) Svi posjetioci su obavezni brinuti o čistoći objekta, te da svojim postupcima i ponašanjem ne uzinemiravaju ostale posjetioce, da ne stvaraju pretjeranu buku, da se brinu o ličnoj sigurnosti kako sebe samih tako i drugi osoba i da ne trče po mokrim površinama.
- (2) Svaki posjetilac je obavezan nadoknaditi sve gubitke i štete koje je izazvao, do kojih je došlo njegovom krivicom kako na opremi objekat, tako i na imovini ostalih lica.
- (3) Svaki posjetilac je u obavezi da se pridržava uputstava, obaveštenja i upozorenja, istaknutih u objekatu.
- (4) Posjetilac je u obavezi da napusti plivalište velikog (olimpijskog) i malog (rekreacionog) bazena, te prostorija za fitnes, teretenu, saunu i masažu 30 minuta prije završetka radnog vremena.
- (5) Posjetioci su obavezni pridržavati se uputstava spasilaca, zaštitara, redara i personala objekta.

Član 15.
(Odgovornosti posjetilaca)

- (1) Za povrede koje posjetilac izazove vlastitom neopreznošću ili nepoštovanjem ovog Pravilnika, uprava ne snosi odgovornost.
- (2) Posjetioci snose potpunu odgovornost za zaključavanje ormarića, u kojima imaju ostavljene lične stvari i odjeću. Ormarići, koji su ostali zaključani poslije završetka radnog vremena objekta, po završetku rada bit će otvoreni od strane dežurnog osoblja, a sadržaj će biti tretiran kao izgubljena imovina.
- (3) Uprava ne odgovara za lične stvari izgubljene u objekatu.
- (4) U slučaju nepoštovanja ograničenja i upozorenja, koje na određeni način ograničavaju upotrebu u objektu, posjetilac preuzima na sebe odgovornost za bilo kakve povrede ili druga oštećenja koja proizlaze iz rizičnog ponašanja. Osoba koja pod uticajem alkohola koristi bazen, prostorije za fitnes, teretanu, saunu i masažu radi to na sopstveni rizik. U slučaju povreda dobijenih pod utjecajem alkohola, droga i drugih narkotičkih sredstava uprava ne snosi odgovornost.

POGLAVLJE V - Zabranjene radnje

Član 16. (zabrana postupanja za radnike i korisnike)

(1) U objektu je zabranjeno:

- a) Da radnici postupaju i daju privilegije po bilo kom osnovu korisnicima u suprotnosti sa ovim Pravilnikom;
- b) Da korisnici traže od radnika usluge koje su u suprotnosti sa ovim Pravilnikom;
- c) Uništavati opremu objekta i rasipati vodu;
- d) Kupati se u odjeći nepodobnoj za kupanje, uključujući donji veš. Djeci svih uzrasta je ulaz u bazen iz higijenskih razloga dozvoljen samo u kupaćem kostimu ili specijalnim kupaćim (vodootpornim) pelenama;
- e) Neopravdano tražiti pomoći;
- f) Ulaziti u prostore koji nisu namenjeni za javnost, u svlačionice i tuševe osoba suprotnog pola i u dijelove objekta, gdje je označena zabrana ulaza iz sigurnosnih ili tehničkih razloga;
- g) Skakati u bazen mimo prostora namenjenih za to, trčati po hodnim stazama, skakati sa njih i sa drugih rizičnih mesta;
- h) Nositi u bazen predmete koji nisu predviđeni za plivanje i kupanje;
- i) Galamiti, zviždati, praviti nepotrebnu buku, trčati (opasnost od povrede uslijed okliznuća), uzajamno se gnjurati i obarati druge osobe ili se na drugi način nedolično ponašati;
- j) Pljavati na pod i u vodu, namerno prljati i zagađivati vodu, mokriti u bazen, bacati otpatke i zagađivati prostor objekta;
- k) Pušiti u prostorima objekta, izuzev u onim dijelovima obilježenom kao pušačka zona;
- l) Neovlašteno upotrebljavati opremu za spasavanje i predmete prve pomoći, aparate za gašenje požara ili drugu opremu koja objektu služi za vanredne situacije;
- m) Svojevoljno premještati opremu i instalirani nameštaj;
- n) Nositi sa sobom oštре predmete, staklene stvari, koje se mogu razbiti i time izazvati povredu;
- o) Pranje veša i umivanje sapunom izvan prostora određenog za ove namjene;
- p) Ulaziti u bazene sa žvakaćom gumom;
- q) Konzumacija hrane u prostorima plivališta, ili drugim, za ovu svrhu, nerezervisanim prostorima. U slučaju kršenja ove zabrane uprava ima pravo odmah da udalji posjetioca iz objekta bez prava na povrat novca za ulaznicu;
- r) Donositi vlastita pića, alkoholna pića i flaše;
- s) Nošenje i upotreba oružja bilo koje vrste;
- t) Fotografisanje ili snimanje posjetilaca ili grupe ljudi bez njihove saglasnosti;
- u) Korištenje muzičkih instrumenata, audio tehnike ili televizije;
- v) Nanositi štetu, prljati, premještati, pisati običnim ili alkoholnim folmasterima po unutrašnjosti bazena, mjenjati ili uklanjati predmete ili oznake koji su postavljeni u objektu;
- w) Uznemiravati kupače, posjetioce, spasioce i druge zaposlene u kompleksu i narušavati sigurnost kupača i posjetilaca na bilo koji način;
- x) Ponašati se na prostoru plivališta velikog i malog bazena, te prostorija za fitnes, teretenu, saunu i masažu protivno ovom Pravilniku i pozitivnim propisima;
- y) Korištenje sredstava za higijenu u plivalištu objekta;
- z) Korišćenje pištaljke ili sličnih sprava/uređaja za davanje zvučnih signala koje mogu remetiti rad spasilačke i drugih stručnih službi u objektu.

POGLAVLJE VI - Ostale odredbe

Član 17.

- (1) Pravilnik o kućnom redu i načinu korištenja objekta odnosi se na opštu upotrebu. Izuzeci mogu biti odobreni u specijalnim slučajevima, bez neophodnosti promjene ovog pravilnika. Promjenu može odobriti samo direktor Olimpijskog bazena Otoka.

(2) Za fotografisanje i snimanje u okviru kompleksa u komercijalne svrhe i za štampu neophodna je obavezna dozvola nadležnih radnika objekta.

POGLAVLJE VII - Prelazne i završne odredbe

Član 18.

(Postupak izmjene i dopune pravilnika)

Izmjene i dopune ovog Pravilnika vrši direktor Preduzeća, na način i u postupku propisanom za njegovo donošenje.

Član 19.

(Stupanje na snagu)

Ovaj pravilnik stupa na snagu danom donošenja i objavit će se na oglasnoj tabli u sjedištu Preduzeća.

Član 20.

(Prestanak važenja ranijeg propisa)

Donošenjem ovog Pravilnika prestaje važiti Pravilnik o kućnom redu u objektu «OLIMPIJSKOG BAZENA OTOKA», broj: 02-1-1453/23 od 14. 08. 2023. godine.



dr Avdija Hasanović, direktor

Z. L. Hasanović

Broj: 02-1-336/24
Sarajevo, 26. 02. 2024. godine